

Mid-Day Dogri News Bulletin, 25th Augsut 2024

समे – 12:25

<><><><><><>

PM-MKB

प्रधानमंत्री नरेन्द्र मोदी होरें गलाया ऐ जे मुल्खै दे युवाएं गी अंतरिक्ष खेत्तरे च सुधार करी बड्डा लाह होआ ऐ। मन की बात प्रोग्राम उपपर लोकें गी संबोधत करदे होई उनें आखेआ जे भारत गी विकसित बनाने आस्तै मुल्खै च बड्डे कम्म चला'रदे न। इस म्हीने दी 23 तरीक गी मुल्खै च लोकें राष्ट्र अंतरिक्ष दिवस मनाया, की जे इस दिन चन्द्रयान-3 गी शिव शक्ति बिंदू उपपर सफलतापूर्वक पजाया गेआ। इस कामयाबी कन्नै भारत दुनिया दा पैहला मुल्ख बनेआ जेहड़ा इत्थुं तगर पुज्जेआ। “हर घर तिरंगा” अभियान दे बारे गल्ल करदे होई प्रधानमंत्री होरें गलाया जे जम्मू कश्मीर दे रियासी जिले च 750 मीटर दी लम्बाई दा झंडा चिनाव रेलवे पुल जेहड़ा दुनिया दा सब्बने शा उच्चा पुल ऐ, उत्थें चाढ़ेआ गेआ। उनें गर्व कन्नै आखेआ जे जिस कुसै नै बी इस पुलै उपपर इस झंडे दी फोटू दिक्खियां होंगन, ओहदा कलेजा खुशी कन्नै भरोची गेआ होग। उनें डल झील उपपर होइ दी तिरंगा यात्रा दी फोटूएं दा बी जिक्र कीता।

<><><><><><>

PM-Maharashtra

प्रधानमंत्री नरेन्द्र मोदी होर अज्ज महाराष्ट्र दे जलगांव ते राजस्थान दे जोधपुर दा दौरा लांगन। प्रधानमंत्री होर अज्ज डलै लखपति दीदी सम्मेलन च हिस्सा लैने लेई जलगांव दा दौरा करगंन। इस दरान ओह उनें 11 लक्ख नमीं लखपति दीदिएं गी सम्मानत करगंन ते प्रमाण पत्र देंगन। जेहड़ियां हाल च गै एनडीए सरकार दे त्रीए कार्यकाल दरान लखपति बनियां हियां। प्रधानमंत्री होर इस दरान इंदे कन्नै गल्लबात बी करगंन। एहदे इलावा प्रधानमंत्री होर 2 ज्हार 500 करोड़ रपे दा फंड जारी करगंन जेहदे कन्नै आप सहायता समूह दे तकरीबन 48 लक्ख सदस्येंग ी फायदा होग। ओह 5 ज्हार करोड़ रपे दा बैंक लोन बी मुहैया करांगन जेहदे कन्नै आप सहायता समूहें दे 26 लक्ख सदस्यें गी लाह पुज्जोग। ध्यानजोग ऐ जे लखपति दीदी योजना शुरू होने दे बाद 1 करोड़ महिलां लखपति दीदी बनी गेदियां न ते सरकार नै 3 करोड़ लखपति दीदी बनाने दा धेइया पक्का कीता ऐ। तोआई संजा'लै प्रधानमंत्री होर राजस्थान च जोधपुर पुज्जगंन। ओह राजस्थान हाई कोर्ट दे 70 ब'रे

पूरे होने दे समारोह च मुख्य परौहने होंगन। एहदे कन्नै गै प्रधानमंत्री होर राजस्थान हाई कोर्ट म्यूजियम दा उद्घाटन बी करगंन।

<><><><><><>

NASA Space

नासा दे 2 अंतरिक्ष यात्री सुनीता विलियमस ते बैरी विल्मोर होर फरवरी 2025 गी स्पेस एक्स राएं धरती पर वापस आँगन। एह दौनें अंतरिक्ष यात्री मूल रूप च 8एं दिनें दे मिशन पर हे, लेकन बोइंग स्टारलाइनर, अंतरिक्ष यान च खराबी दे कारण नेंगी अंतरिक्ष च तकरीबन 8 म्हीने रुकना होग। नासा नै आखेआ ऐ जे स्टारलाइनर बिजन क्रयू यानि चालक दल दे धरती पर वापस आँग। अंतरिक्ष यान गी अंतराष्ट्रीय अंतरिक्ष स्टेशन दी यात्रा दरान हीलियम लीक ते होरने खराबिएं दा सामना करना पेआ। बोइंग ते नासा दे इंजीनियर स्टारलाइनर कन्नै तकनीकी खराबिएं गी हल करने लेई कम्म करा'रदे न ते अंतरिक्ष यात्रिएं दी सुरक्षत वापसी जकीनी बनाने लेई बी जतन जारी न।

<><><><><><>

Randomizations EVM

जम्मू कश्मीर च आँदे विधानसभा चुनाएं लेई ईवीएम ते मतदान सत्यापन पर्ची वीवीपीएटी दी जांच दा पैहला गेड कल जम्मू जिले च कामयाबी कन्ने मुकम्मल होआ। आकाशवाणी दे जम्मू संवाददाता नै खबर दित्ती ऐ जे एह इस सारी प्रक्रिया रिटर्निंग अफसरें ते सियासी दलें दे नुमायंदे दी मजूदगी च कीती गई। जांच आली कारवाई भारतीय चुनां आयोग आस्सेआ जारी कीते गेदे दिशा-निर्देशों मताबक कीती गई। जिले दे 11 विधानसभा हल्के दे 1497 मतदान केन्द्र लेई कुल 2242 बैलेट यूनिट, 2242 कंट्रोल यूनिट ते इन्नियां गै वीवीपीएटी मशीनें दी रेंडमाइजेशन कीती गई। इस प्रक्रिया कन्नै तैआर लिस्टां राजनीतिक दलें दे नुमायंदे गी सौंपिया गेइयां ते इस पूरे कम्म दी वीडियो बी बनाई गई।

<><><><><><>

Kishtwar SVEEP

किश्तवाड़ दे डीईओ राकेश कुमार शावन होरें गी स्वीप प्रोग्राम दे हेठ गौरमेंट डिग्री कालेज किश्तवाड़ च जागरूकता अभियान चलाया। एहदे कन्नै उत्थें युवा सेवा ते खेड्ड विभाग नै बी 2024 दे आईडीडीएल कोड्डी प्रतियोगिता दा बी आयोजन कीता। आँने आले विधानसभा

चुनाएं लेई किशतवाड़ जिले च किशतवाड़, पाड्डर, नागसेनी ते इंदरवाल हल्के च अभियान चलाया।

<><><><><><>

SVEEP Activities

औं दे विधानसभा चुनाएं च लोकें दी बद्ध शा बद्ध शमूलियत गी जकीनी बनाने दे मकसद कन्ने रामबन जिला प्रशासन नै समूलचे जिले च व्यवस्थित मतदाता शिक्षा ते चुनावी हिस्सेदारी सरबंधी स्वीप कार्यक्रमें दी इक लड़ी दा सरिस्ता कीता। आकावाणी जम्मू संवाददाता नै दस्सेआ जे इनें पैहलें दा लक्ष्य वोटरें गी जागरूक बनाना हा, जिंदे च नोजवान मतदाताएं पर टकोहदा ध्यान दित्ता गेआ। मुख् कार्यक्रमें च इक सरकारी हायर सकेँडरी स्कूल ते प्राइमरी अप्पर स्कूल हरवारी च लग्गा, जित्थें बड़ी बद्ध गिनतरी च विद्यार्थिणें ते आम लोकें एहदे च शिरकत कीती। कार्यक्रम च विधानसभा चुनाएं च मतदान दे महत्वै पर जोर पाया गेआ, टकोहदा करियै पैहली बारी वोट पाने आलें गी अपने वोट पाने आले हक दा इस्तेमाल करने लेई प्रेरित कीता गेआ। गौरमेंट हाई स्कूल परहिंदर च बी इक बड्डे कामयाब स्वीप कार्यक्रम दा सरिस्ता कीता गेदा हा।

<><><><><><>

SVEEP Udhampur

लोकें च मतदाता जागरूकता बधाने आस्तै उधमपुर दियां जिला चुनां अधिकारी सलोनी राय होरें कल डीसी दफतर थमां स्वीप अभियान तैहत इक बड्डी रैली गी झंडी दस्सियै रवाना कीता। आकाशवाणी दे जम्मू संवाददाता ने खबर दित्ती ऐ जे जिला प्रशासन दे आला अफसरें दे कन्नो कन्नी बक्ख-बक्ख मैहकमे दे नुमायंदे, विद्यार्थिणें ते शैक्षणिक इदारें दे कर्मचारिणें इस रैली च शामिल होए। रैली स्लाथिया चौक, कोर्ट रोड, रामनगर चौक, गोल मार्किट ते बस स्टैंड थमां होइयै मिनी स्टेडियम पुज्जियै मुकम्मल होई। इस मौके जिला चुनां अधिकारी होरें लोकतंत्र गी मजबूत करने आस्तै हरेक वोट दी कीमत पर बल पाया ते सब्बै वोटरें गी औं दे विधानसभा चुनाएं च 100 फीसदी मतदान लेई कोश्ट करने लेई प्रेरित कीता। मगरा जिला प्रशासन नै स्पोर्टस स्टेडियम उधमपुर च स्वीप पैहल तैहत गुड्डिडं डोआने आले इक कार्यक्रम दा बी सरिस्ता कीता।

<><><><><><>

Blood Donation

डोडा जिले दे उप जिला अस्पताल गंदोह च कल आयोजित कीते गेदे स्वीप कार्यक्रम दरान रक्तदान शिविर दा सरिस्ता कीता गेआ। आकाशवाणी दे जम्मू संवाददाता नै जानकारी दित्ती जे खून देने आले 22एं जनें मानवता दी सेवा दे मकसद कन्नै रक्तदान कीता। उंदे इस अनमुल्ले योगदान दी सराहना करदे होई गंदोह दे बीएमओ डाक्टर फारुक सलीम होरें कुसै बचाने च मददगार साबत होने आले इस कर्में च समर्पण ते मनुखी भावना गी स्वीकार कीता। बीएमओ होरें इस गल्ला पर बी जोर पाया जे हर जने टकोहदा करियै नोजवानें गी अगगे आइयै रक्तदान करना लोडचदा।

<><><><><><>

